

इवनिंग डोगरी न्यूज बुलेटिन

समे.18:15 Hrs

<><><><><><>

Headlines

1. प्रधानमंत्री नरेंद्र मोदी होर अज्ज संझा थमां 2 मुख्यें जपान ते चीन दी जातरा पर रवाना होआरदे न।
2. बांडीपोरा च सुरक्षाबलें घुसपैठ दी इक कोशिश गी नाकाम बनांदे होई 2 आतंकवादिएं गी मारी मकाया।
3. उपमुख्यमंत्री सुरेंद्र चौधरी होरें भगवती नगर जम्मू च तवी दरेआ पर बने दे चौथे पुल दे हिस्से गी पुज्जे दे नुकसान दा व्यापक जायजा लैता।
4. जम्मू-श्रीनगर राष्ट्रीय जरनैली शिड़क गड़डिएं दी आओजाई लेई बंद।
5. जम्मू खिते दे सारे स्कूल 30 अगस्त तगर बंद रौहडन।

<><><><><><>

PM-Japan Visit

प्रधानमंत्री नरेंद्र मोदी होर अज्ज जपान दी जातरा लेई रवाना होडन। ओह जपान दे प्रधानमंत्री शिगेरू इशिबा हुंदे कन्नै 15में भारत-जपान सालाना शिखर सम्मेलन च हिस्सा लैने लेई जा'रदे न। एह प्रधानमंत्री हुंदी जपान दी 8मीं जातरा होग ते प्रधानमंत्री इशिबा हुंदे कन्नै एह उं'दी पैहली शिखर गल्लबात होग। जातरा दे दुए गेड़ च प्रधानमंत्री मोदी होर चीन जाडन जित्थे ओह 31 अगस्त थमां पैहली सितंबर तगर आयोजित होने आहले शंघाई सहयोग संगठन च हिस्सा लैडन। ओह चीन दे राष्ट्रपति Xi Jinping हुंदे साददे पर उत्थे जा'रदे न।

<><><><><><>

Terrorist-Killed

बांडीपोरा जिले दे गुरेज सैक्टर आहली कब्जा रेखा कन्नै लगदे इलाकें च सेना नै घुसपैठ दी इक कोशिश गी नाकाम बनांदे होई 2 आतंकवादिएं गी मारी मकाया ऐ। इक टकोहदी सूह पर सेना ते पुलस आसेआ सांझा अभियान चलाया गेआ ते घुसपैठ गी नाकाम कीता गेआ। श्रीनगर आधारित चिनार कोर नै इस बारें एक्स पर जानकारी दिती। सेना नै संदिग्ध नकलो-हरकत दिक्खी। सेना दे सौहगे जोआनें घुसपैठिएं गी ललकारेआ पर उस भेठा दा गोलीबारी कीती गेई जेदा सुरक्षाबलें आसेआ परता दिता गेआ। इस टाकरे च 2 आतंकवादी मारे गे।

<><><><><><>

उपमुख्यमंत्री सुरेंद्र चौधरी होंरें अज्ज जम्मू दे भगवती नगर आहले तवी नदी पर बने दे चौथे पुल गी पुज्जे दे नकसान दा जायजा लैने लेई व्यापक दौरा लाया। अपने दौरें दरान उनें मुतल्लका अफसरें कन्नें इसी फौरी बहाल करने लेई तरीकाकार अपनाने लेई गलाया तां जे लोकें गी आवाजाई च सौख होई सकै। उनें आखेआ जे इस बारें इक जांच करोआई जाग। इस पुल गी होए दे नुकसान करी लोकें गी आवाजाई च खासी परेशानी होआ करदी ऐ। मीडिया कर्मिं कन्नें गल्ल करदे होई उपमुख्यमंत्री होंरें आखेआ।

<><><><><><>

SMVD-Yatra Suspended

अद्द कुंवारी च ल्हास-पस्सियां पौने करी कई श्रद्धालुं दे मारे जाने ते केइं दे जखमी होई जाने दे बाद अज्ज उप्परोतली त्रीए ध्याड़े बी श्री माता वैशणो देवी जी दी जातरा गी बंद रक्खेआ गेदा ऐ। एन.डी.आर.एफ, एस.डी.आर.एफ, पुलस ते श्राइन बोर्ड दे अमले आसेआ पूरी सरगर्मी कन्नें राहत ते बचाऽ अभियान तोढ़ चाढ़े जा'रदे न। इस कुदरती करोपी च जखमी होए दे श्रद्धालुं गी ईलाज लेई रियासी ते जम्मू दे अस्पतालें च मुंतकिल कीता गेदा ऐ। श्री माता वैशणो देवी जातरा मार्ग पर आम ध्याड़े आहला लेखा आओ-जाई बहाल करने आस्तै सब्बे मुमकिन जत्न कीते जा'रदे न।

<><><><><><>

Katra Free Acomodation

कटड़ा च भारी बरखा ते हाड़ ज्नेय हालात दे मगरा प्रभावित होए दे आम जन-जीवन ते बता फसे दे वैशणो देवी शरदालुं दी हालत गी दिखदे होई कटड़ा होटल एसोसिएशन नै बड़ा हमदर्दी आहला रोंऽ इखितयार करदे होई एह ऐलान कीता ऐ जे हाड़ें करियै कटड़ा च फसे दे सब्बनें शरदालुं गी रौहने-बौहने दी मुफ्त सुविधा उपलब्ध करोआई जाग। कटड़ा होटल एसोसिएशन दे प्रधान राकेश वजीर होंरें आखेआ ऐ जे कटड़ा च सब्बे होटल इस गल्ला गी यकीनी बनाडन जे इस औकखी घड़ी दरान कुसै बी शरदालु गी कोई असुविधा पेश नेई आवै। आकाशवाणी समाचार कन्नें इस बारें गल्ल करदे होई कटड़ा होटल एसोसिएशन दे प्रधान राकेश वजीर होंरें आखेआ

<><><><><><>

Special-Educators

सरकारें सुप्रीम कोर्ट दिं हिदायतें मूजब एडहॉक ते कंट्रैक्चुअल स्पैशल एजुकेटर्स दिं सेवां गी पक्का करने सरबंधी मामलें दी दिक्ख-सुन लेई इक्क जांच कमेटी खडेरी ऐ। आकाशवाणी दे जम्मू संवाददाता दी रिपोर्ट मूजब इस कमेटी दी प्रधानता स्कूली शिक्षा विभाग दे प्रशासनिक सचिव होर करडन ते दिव्यांग लोकें सरबंधी मैहकमे दे कमिशनर ते आबादकारी सरबंधी भारती कौंसल आसेआ नामजद इक्क व्यक्ति एहदे सदस्य होडन। समग्र शिक्षा दे प्रोजैक्ट डरेक्टर होंरें गी आखेआ गेआ ऐ जे ओह कमेटी दे कम्मै-काजै

च सहयोग देन ते इस गल्ला गी यकीनी बनान जे इक्क म्हीने दे अंदर-अंदर इस बारै रिपोर्ट जमा करोआई दिती जा।

<><><><><><>

PMJDY

प्रधानमंत्री जन-धन योजना दे अज्ज 11 बर्रे पूरे होई गए न। प्रधानमंत्री नरेंद्र मोदी होरें 15 अगस्त 2014 गी लाल किले दी प्राचीर परा एह योजना शुरू करने दा ऐलान कीता हा, जेड़ी अज्ज दुनिया दी सब्बने शा बड्डी माली समावेशन आहली पहलकदमिं चा इक्क बनी गेदी ऐ। सोशल मीडिया दी इक पोस्ट च इस योजना बारै किश झलकियां सांझी करदे होई प्रधानमंत्री मोदी होरें इस गल्लै पर लोs पाई ऐ जे किस चाल्ली इस योजना नै कई लोकें गी माली तौरै पर सशक्त बनाइयै उंदी जिंदगिं च सकारात्मक तब्दीलियां आहिनयां न। श्री मोदी होरें इस गल्ला पर जोर पाया जे जिस्सलै समाज दे भलेआं गरीब माहनुआं गी बी माली तौरा पर सशक्त बनाया जंदा ऐ तां समूलचा राष्ट्र किट्ठै रलिए अगड़ा बधदा ऐ। उनै आखेआ जे पी.एम-जन धन योजना नै इस लक्ष्य गी बखूबी हासिल कीता ऐ।

<><><><><><>

NHW-Closed (byte)

उधमपुर ते रामबन दे इलाकें च भारी बरखें करी कई थाहरें पेदिं ल्हास-पस्सिं दे चलदे जम्मू-श्रीनगर राष्ट्री जरनैली शिड़क अज्ज उप्परोतली त्रीए ध्याड़े बी गड्डिं दी आओजाई लेई बंद ऐ। उधमपुर च जखैनी ते चनैनी बश्कार कई सारी थाहरें पर ल्हास-पस्सियां पौने दे चलदे 270 किलोमीटर लम्मी एह शिड़क फिलहाल बंद ऐ जिस करी कई थाहरें पर तकरीबन 500 शा 600 गड्डियां बता फसी दियां न। इस सरबंथै च होर जानकारी दिंदे होई एसएसपी ट्रैफिक एन.एच.डब्ल्यू राजा आदिल होरें आखेआ।

<><><><><><>

Scholls-Closed

खित्ते च बने दे खराब मौसम से मद्देनजर सरकारै समूलचे जम्मू-कश्मीर च औंदी 30 अगस्त तोड़ी सब्बने सरकारी ते निजी स्कूलें गी बंद रखने दा ऐलान कीता ऐ। विद्यार्थिं दी सुरक्षा यकीनी बनाने लेई इक्क एहतियाती हीले दे तौरा पर एह फैसला लैता गेआ ऐ।

<><><><><><>

Bridge-Damaged

उधमपुर दे समरोली इलाके कश बंटी पुल गी कल इलाके च होई दी भारी बरखें करी खरा मता नुकसान होआ ऐ। एह पुल जिले दी 20 थमां मती पंचैतें गी आपूं'चै जोड़दा ऐ। इस इलाके दे लोकें दा आखना ऐ जे 9 बर्रे पैहले गै उनेंगी लम्मी जद्दोजहद परेंत एह पुल थहोआ हा ते हून एह रूढ़ी गेआ ऐ। इस करी

जरनैली शिड़क ते जिले तगर उंदी पुज्ज नेई रेई ऐ। इस पुल गी होए दे नुकसान करी 50 जहार दी आबादी गी मुश्कल झल्लनी पवारदी ऐ। इस बारै अपने विचार सांझा करदे होई मुकामी लोकें आखेआ।

<><><><><><>

JMC-Drive

हाल च आए दे हाड़ मगरा जम्मू म्युनिसिपल कारपोरेशन नै शहर च बड्डे पैमाने पर साफ-सफाई आहली मुहिम शुरू कीती ऐ। एह कम्म जेएमसी कमिशनर देवांश यादव हुं'दी हिदायतें मूजब होआ'रदा ऐ। उनें नालें ते रिहायशी इलाकें गी साफ करने लेई अज्जै थमां टीमां तैनात कीतियां। शैहरै गी साफ करने लेई 3 हिस्सैं च बंडेआ गेआ ऐ तां जे कम्म सुचारू ढंग्गै सिर होई सकै। इस मुहिमन दा मुख मकसद मलबे, कचरे दे ढेर हटाना ते नालें गी साफ करना ऐ। इस बारै होर जानकारी दिंदे होई जेएमसी कमिशनर होरें आखेआ।

<><><><><><>

PM-MKB

प्रधानमंत्री नरेन्द्र मोदी होर 31 अगस्त ऐतवार दिनें 11 बजे अपने माहवार रेडियो कार्यक्रम “मन की बात” दे राएं देश-बदेश च रौहने आहले लोकें कन्ने अपने बचार सांझे करडन। एह इस कार्यक्रम दी 125मीं किश्त होग जेहदा प्रसारण आकाशवाणी ते दूरदर्शन दे समूलचे नेटवर्क दे कन्नो-कन्नी आकाशवाणी खबरें दी वेबसाइट ते न्यूज ऑन ए.आई.आर मोबाइल ऐप ते डीडी न्यूज, आकाशवाणी न्यूज, प्रधानमंत्री हुं'दे दफ्तर ते सूचना ते प्रसारण मंत्रालय दे यूट्यूब चैनलें पर बी कीता जाहग। आकाशवाणी जम्मू आसेआ मन की बात दे तुरत मगरा एहदा डोगरी च अनुवाद प्रसारत कीता जाहग जिसी तुस रातीं 8 बजे इक बारी परतियै बी सुनी सकदे ओ।

<><><><><><>